



# Icyegeranyo cy'amakuru y'imikino yaranze icyumweru

2023

Taliki 14–16 Nyakanga



P.1 Basketball : u Rwanda rwegukanye umwanya wa gatatu muri "FIBA AfroCan 2023"

## Ijambo ry'ibanze

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'Imikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigitimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

- P1 **Basketball** : u Rwanda rwegukanye umwanya wa gatatu muri "FIBA AfroCan 2023"
- P2 **Karate** : Abana 170 bitabiriye imyitozo yo kubongerera ubumenyi
- P3 **Golf**: Abakinnyi 275 ni bo bitabiriye "Liberation Inter-Club Golf Challenge 2023"
- P3 **Basketball** : FERWABA na FEGABAB basinye amasezerano y'ubufatanye
- P4 **Football**: u Rwanda rwasezerewe na Uganda mu gushaka itike y'imikino Olempike 2024
- P4 **Tennis** : Umumararungu na Hakizumwami begukanye "Cogebanque Tennis Open 2023"
- P5 **Cycling** : Habaye umunsi wa mbere wa shampiyona y'abakiri bato

Taliki 16 Nyakanga 2023 ni bwo hasojwe irushanwa ry'Afurika rikinwa n'abakinnyi bakina muri Afurika mu mukino wa Basketball mu bagabo "FIBA AFROCAN 2023" ryaberaga i Luanda muri Angola kuva taliki 08 Nyakanga 2023.

Iri rushanwa ryari ribaye ku nshuro ya kabiri ryari ryitabiriwe n'amakipe 12 aho yari yashyizwe mu matsinda 4. Itsinda A ryari rigizwe na Kenya, Gabon na Cote d'Ivoire, itsinda B ririmo Angola, Nigeria na Mali, itsinda C rigizwe na Maroc, Tunisia n'u Rwanda naho itsinda D ririmo RDC, Mozambique na Cameroun.

Amakipe yakinye hagati yayo mu mikino y'amajonjora hanyuma ikipe ya mbere ibona itike ya  $\frac{1}{4}$  cy'irangiza hanyuma ikipe ya kabiri n'iya gatatu muri buri tsinda zikina imikino yo gushaka itike ya  $\frac{1}{4}$ .

Ikipe y'u Rwanda mu mikino yo mu matsinda yatsinzwe na Tunisia amanota 67 kuri 61 inatsindwa na Maroc amanota 59 kuri 58. Mu mukino wo gushaka itike ya  $\frac{1}{4}$ , ikipe y'u Rwanda yatsinze Mozambique amanota 73 kuri 62.

Muri  $\frac{1}{4}$ , ikipe y'u Rwanda yitwaye neza itsinda Angola yari iri mu rugo amanota 73 kuri 63. Muri  $\frac{1}{2}$ , ikipe y'u Rwanda yatsinzwe na Cote d'Ivoire amanota 74 kuri 71.

Iyi kipe y'u Rwanda yitwaye neza yegukana umwanya wa gatatu itsinze RDC amanota 82 kuri 73.

Ikipe ya Maroc ni yo yegukanye igikombe itsinze ku mukino wa nyuma ikipe ya Cote d'Ivoire amanota 78 kuri 76. Ikipe ya Maroc yari yageze ku mukino wa nyuma isezereye RDC muri  $\frac{1}{2}$  ku manota 76 kuri 69.

## Uko amakipe yakurikiranye

Ikipe ya Maroc yegukanye umwanya wa mbere ihabwa umudali wa zahabu n'igikombe ikurikirwa na Cote d'Ivoire, Rwanda (3), RDC (4), Tunisia (5), Kenya (6), Angola (7), Nigeria (8), Gabon (9), Mozambique (10), Cameroun (11) na Mali (12).

## Hatowe ikipe y'irushanwa

Abakinnyi 5 bagize ikipe y'irushanwa ni Jihad Benchlikha, Kevin Bruno Franceschi (Maroc), Evariste Shonganya (RDC), Ndizeye Ndayisaba Dieudonne (Rwanda) na Mike Fofana (Cote d'Ivoire). Kevin Bruno Franceschi ukunira ikipe y'igihugu ya Maroc ni we wabaye umukinnyi witwaye neza mu irushanwa ryose "MVP".

Biteganyijwe imikino ya "FIBA AfroCan" izongera kuba muri 2027 aho amakipe 4 yitwaye neza uyu mwaka afite itike y'imikino ya nyuma akaba atazanyura mu mikino y'amajonjora. Aya makipe ni Maroc, Cote d'Ivoire, u Rwanda na RDC.



Taliki 15 Nyakanga 2023 muri Lycée Notre Dame des Anges i Remera habereye imyitozo yo kongerera ubumenyi mu mukino wa Karate abana basaga 170 bari hagati y'imyaka 4 na 15 baturutse hirya no hino mu Rwanda.

Iyi gahunda yateguwe n'ishyirahamwe ry'umukino wa Karate mu Rwanda "FERWAKA" mu rwego rwo gutyaza aba bana no kuzamurirwa urwego rw'imikinire.

Iyi myitozo yakoreshejwe n'umutoza w'ikipe y'igihugu ya Karate, Nkuranyabahizi Noël, afatanyije n'abandi batoza biganjemo abakinnyi ba mbere mu gihugu nka Shyaka Ndutiye, Niyitanga Halifa, Ntwali Fiston na Uwase Rasia.

Mu byibanzweho harimo kwigisha abana iby'ibanze ku mukino wa Karate, tekunike zo kurwana no kwiyerekana, amategeko agezweho y'ishyirahamwe ry'uyu mukino ku Isi "WKF" n'indangagaciro Olempike.

Umutoza w'ikipe y'igihugu, Nkuranyabahizi Noël yavuze ko bishimiye urwego babonyeho abana ku buryo bigaragaza ko abatoza babo bari gukora cyane ndetse na bo ubwabo bakaba bafite inyota yo kwiga.

Perezida wa FERWAKA, Niyongabo Damien yashimangiye ko gutegura iki gikorwa ari imwe mu nzira zo kubaka umusingi wa Karate mu Rwanda kandi bishimira ko n'ababyeyi babyumva. FERWAKA iteganya ko muri Nzeri 2023 hazaba amarushanwa ku rwego rw'igihugu ku buryo abana bazashyira mu bikorwa ibyo bigishijwe.



## Golf: Abakinnyi 275 ni bo bitabiriye "Liberation Inter-Club Golf Challenge 2023"

Taliki 15 Nyakanga 2023 ni bwo hasojwe irushanwa ry'umukino wa "Golf" ryo kwizihiza umunsi wo Kwibohora rikabera ku kibuga cya Kigali Golf Resort & Villas "Crystal Ventures Liberation Inter-Club Golf Challenge 2023".

Iri rushanwa ryitabiriwe n'abakinnyi 275 baturutse mu bihugu bitandukanye muri Afurika birimo Uganda, Kenya, u Burundi, Nigeria n'u Rwanda.

Irushanwa ryatangiyeye taliki 10 Nyakanga 2023 aho mu minsi ya mbere ryitabiriwe n'abakinnyi basanzwe batwaza ibikapu abakinnyi, hakurikiraho abana hanyuma umunsi wa nyuma hakina abakuze.



## Basketball : FERWABA na FEGABAB basinye amasezerano y'ubufatanye

Taliki 16 Nyakanga 2023 hasinywe amasezerano y'ubufatanye mu gihe cy'imyaka 4 hagati y'ishyirahamwe ry'umukino wa Basketball mu Rwanda "FERWABA" ndetse n'iryori muri Gabon "FEGABAB".

Aya masezerano yashyizweho umukono na Mugwiza Désiré Perezida wa FERWABA ndetse na Willy Conrad Asseko, Perezida wa FEGABAB.

Muri aya masezerano y'ubufatanye y'imyaka 4, ibihugu byombi bizayungukiramo mu bijyanye no guteza imbere umukino wa Basketball.

Biteganyijwe ko abakinnyi, abatoza n'abandi bose bafite aho bahurira n'umukino wa Basketball muri Gabon bazajya baza mu Rwanda kwihugura mu buryo butandukanye ndetse no ku ruhande rw'u Rwanda bikaba uko.

Ubuyobozi bwa FEGABAB bwagaragaje ko hari byinshi bafite bakwigira ku Rwanda kuko muri iyi minsi rwakiriye ibikorwa bitandukanye by'umukino wa Basketball harimo imikino mpuzamahanga, amahugurwa y'abatoza n'ibindi.

Umuhango wo gushyira umukono ku masezerano y'ubufatanye wabereye muri Hotel Victoria Garden muri Angola aho amakipe y'ibihugu byombi yari acumbitse ubwo yitabiraga imikino ya "FIBA AfroCan 2023".



## Football: u Rwanda rwazereye na Uganda mu gushaka itike y'imikino Olempike 2024

Taliki 16 Nyakanga 2023 ni bwo habaye umukino wo kwishyura hagati y'ikipe y'u Rwanda na Uganda mu mupira w'amaguru mu cyiciro cy'abagore mu rwego rwo gushaka itike y'imikino Olempike 2024.

Ikipe ya Uganda yasezereye ikipe y'u Rwanda nyuma yo kuyitsinda ibitego 4-3 mu mikino yombi yabereye kuri Kigali Pelé Stadium i Nyamirambo.

Mu ijongora rya kabiri, ikipe ya Uganda izahura na Cameroun.



## Tennis : Umumararungu na Hakizumwami begukanye "Cogebanque Tennis Open 2023"

Taliki 15 Nyakanga 2023 hasojwe irushanwa ry'umukino wa Tennis "Tennis Open 2023" aho ryegukanwe na Hakizumwami Junior na Umumararungu Gisèle.

Iri rushanwa ryari ribaye ku nshuro ya 7 ryabereye muri Cercle Sportif de Kigali mu Rugunga ryatangiyeye taliki 07 Nyakanga 2023 aho ryari ryatabiriwe n'abakinnyi 10 ibihugu 4 birimo u Rwanda, u Burundi, Uganda na Kenya.

Mu babigize umwuga mu bagabo, Hakizumwami Junior yegukanye irushanwa nyuma y'aho uwo bari bahanganye ku mukino wa nyuma, Habiyaambere Erneste agize ikibazo cy'imvune akikura mu mukino.

Mu Bagore, Umumararungu Gisèle ni we wegukanye irushanwa amaze gutsinda Mutuyimana Chantal.

Mu bafite ubumuga bakina bicaye mu tugare "Wheelchair Tennis", Hakizimana Emmanuel ni we wegukanye irushanwa atsinze Ndayishimiye Erneste.



Taliki 16 Nyakanga 2023 ni bwo hatangiye shampiyona y'umukino wo gusiganwa ku magare mu bakiri bato "Rwanda Youth Racing Cup 2023".

Iyi shampiyona yabereye mu Karere ka Bugesera muri "Field of Dreams" yatangiye n'ishyirahamwe ry'umukino w'amagare mu Rwanda "FERWACY" mu rwego rwo gutegura shampiyona y'isi izabera i Kigali mu mwaka wa 2025 ndetse no kuzamura impano z'abakinnyi bakiri bato kugira ngo bakurikiranwe.

Abana bitabiriye iri siganwa bari mu byiciro by'imyaka bitandukanye harimo abafite hagati y'imyaka 13 na 14, 15 na ndetse n'abafite hagati ya 17 na 18.

### Uko isiganwa ryagenze

#### • Minimes (13-14)

1. Shema Emmanuel 26'
2. Gisubizo Issa 27'18"
3. Ndacyayisaba Isiaka 27'55"

#### • Cadettes (15-16)

1. Masengesho Yvonne 26'29"

#### • Cadets (15-16)

1. Ntirenganya Moise 40'30"
2. Twagirayezu Didié 41'12"7
3. Tuyipfukamire Aphrodis 41'12"

#### • Women Juniors (17-18)

1. Iragena Charlotte 41'29"
2. Uwera Aline 41'35"
3. Byukusenge Mariate 41'35"

#### • Women Juniors (17-18)

1. Shyaka Janvier 52'36"
2. Tuyizere Hashim 53' 23"
3. Ruhumuriza Aimé 53' 24"





**RWANDA**  
Olympic rings logo



**commonwealth**  
**games**  
**RWANDA**

Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) |     @RwandaOlympic

Address: Remera–Hallmark Center Building KG 17 Ave